

Ezkerreko alderdiek eta talde ekologistek bat egin dute Nicole Pery hautagaiarekin

Ipar Euskal Herrirarendako berezko unibertsitatea galdegin dute prentsaurrekoan

Nicole Pery sozialistak ezkerreko hautesleri guztiaren laguntza beharko du bigarren itzulian Alain Lamassoure gainditzeko. Atzo, lehen itzuliko ezkerreko eta ekologista taldeetako hautagaiekin bat eginez, Baionako unibertsitateko ikasleekin bildu zen, bere xedeen agertzeko.

Hur Gorostiaga / Baiona

JEAN LISSAR (Berdeak), Maurice Garcia (Alderdi Komunista) eta Bernard Causse (CES), Nicole Peryekin batera agertu ziren atzo prentsaurrekoan. «Eskuinari aitzin egiteko batzen gaituena, bereizten gaituena baino handiagoa da» erranik, bigarren itzulian boz bakoitzak urrea balioko duela ohartarazteko egin zuten bat ezkerreko taldeek. Lehen itzulian hamar puntuko tartea zuten sozialista eta RPR-UDFn artean.

Goiza Baionako unibertsitateko ikasleekin eztabaidan pasatua zuten. Ikasleek unibertsitateko ikasketak herrian egiteko nahia nabarmendu zuten, ondotik bertan lana atzemateko. «Unibertsitatea azpigaratua da hemen eta eskuinak egin zituen promesak ez dira bete. Bost mila ikasleko unibertsitatea izan genezake hemen, baina bertze eskualdeetan garatzen diren bitartean gu hemen ez gara mugitzen», zioen Bernard Causse IUTko buru eta



Nicole Pery Alderdi Komunista, Berdeak eta CES alderdiko kideekin azaldu zen prentsaurrekoan.

BOB EDME

irakasleak. Nicole Peryren inguruan bildurik, unibertsitate osoaren beharra azpimarratu zuten, formakuntzaren garapena eta garapen ekonomikoaren bultzatzaile gisa.

Zerbitzu Publikoen egokieraren inguruan ere mintzatu ziren ikasleekin eta politikariek zerbitzu publiko indartsua nahi dutela azpimarratu zuten. «Zerbitzu publikoa modernizatu beharra dagoela ados gara, baina baserri aldean errentagarritasunari begiratzea ez da aski. Herririk ttipienetan ere eskola, posta eta bertzelako zerbitzuak atxiki behar ditugu», adierazi zuen Peryk. Mugaz gaindi harreman ekono-

miko eta kulturalak lantzea eta Euskal Departamendua ere Peryren proposamenetan agertu zen atzokoan berriz ere. «Mugaz gaineko harremanak garatzeko tresnak baditugu, baina ez dago borondate politikorik horien erabiltzeko», salatu zuen hautagaia.

Kazetariei erantzunez, ikastolei buruz Nicole Peryren ordekoak erantzun zuen, kontra ote zegoen zabaldua baitzegoen. «Gauza asko erran da horri buruz, baina nik argi utzi nahi dut euskara salbatzeko irakaskuntza publikoak segurtatu beharko duela euskararen irakaskuntza. Guk ikastolei izaera publikoa eman nahi genien, eskuinak pri-

batua ematea erabaki du. Eztabaida pedagogikoetan sartu gabe, euskarari behar duen laguntza guztia eman behar zaio publikoan», azaldu zuen, Eurokarta sinatzeak hori erraztu dezakeela gaineratuz.

Abertzaleekiko jarreraz ere mintzatu zen Nicole Pery. «Badakite azken hamar urteetan euskara, euskal kultura eta euskal egitura berezia defenditzen aritu naizela. Momentu gogorak izan ditugu. Badakite ez naizela abertzalea, eta abertzaletasunak dakarren itxierarekin ez nagoela ados. Baina euskal berezitasunetik gure aberastasuna lortuko dugula badakit», azaldu zuen. X

Sozialistek Frantzia «paralizatuko» dutela diote Lamassourek eta Grenetek

■ Bigarren itzulian herritarren etorkizuna jokoan dagoela azaldu zuten

Hur Gorostiaga / Baiona

ALAIN LAMASSOURE eta Jean Grenet ez ziren usaiako itxura-ekin agertu. Igandean jasandako beharakadak markaturik, oso urduri agertu ziren, Jean Grenet bereziki.

«Lehen itzulian herritarrek sendimendu bat azaldu zuten, azken gobernatzeko moduarekin akort ez zirela. Baina taldea aldatuko da, eta gobernatzeko era ere bai. Azken finean Frantziaren etorkizuna dago jokoan», azaldu zuen Lamassourek.

Grenet, aldiz, askoz bortitza goa izan zen. «1981ean Mitterrandekin batera aukeratu zituztenak eta 1993an frantses herritarrek boteretik bota zituztenak berriz ere ezarri nahi dizkigute ministro gisa. Baina oroit dezagun Mitterrandek hastapenetik

gezurra erran zigula bere osasun egoerari buruz, ez zela egiazko erresistente bat, eta Estatuko kutxak hutsik utzi zituela. Guk azken bi urteetan herria berriz altxatu genuen eta orain gozatu behar genuen errekuuperatze horretaz. Baina berriz ere arkais-mora itzuli nahi dute sozialistek».

Grenet oso gogorra izan zen sozialistekin eta kohabitazioaz «Frantziaren paralisia helduko» dela iragarri zuen. «Zentro-eskuinarekin, aldiz, hainbat erreforma bultzatu ditugu. Gizarte Segurantzak, zerbitzu militarra, Estatuaren erreforma eta abiatuak diren bertze hainbat erreforma, France Telecom, Air France, deszentralizazioa», izan ziren Baionako auzapezak azaldu zituen puntuak.

Peryk unibertsitateari buruz dioena «erokeriatzat» jo zuten.

«Gaur egun hemengo unibertsitatea hiltzea litzateke autonomia ematea». Hala ere, euskal hizkuntzari buruz, Grenetek Baionako ikastolari ezarri lokal berriak eta Seaskako lizeoaren berrikapena aipatu zituen. Horrez gain AEK eta Ikas-Biri bideraturiko laguntzak ere aipatu zituen.

Alain Lamassourek heldu den igandean eskuineko boz guztiak beharko ditu, eta horien artean Front Nazionalekoak ere bai. Imigrazio eta sekuritate arloez Jean Grenet luzaz aritu zen, Debre eta Pasqua legeak goraipatzeko. Baionaren kasuan, sei familia magrebirekin adibidea eman zuen «magrebiar komunitate osoaren izen ona zikintzen dutenak» direla erranez. «Dauden bizitegiak kanporatzeko eskaera egin dut, baina prefetak



Alain Lamassoure.

BOB EDME

erran dit horretarako bertze egoitza bat atzeman behar dudala. Horrelako egoeraren aitzinean, ezin dugu deus egin», adierazi zuen.

Azkenik, sozialista, komunista eta bertzelako ezker taldeez osaturiko Gobernuak «kakofonia» litzatekeela gaineratu zuen Grenetek. X

**PSNk UPNren
aurkako moziorik
ez duela
sustengatuko esan
du gestorak**

■ Mazuelasek IUren
eta CDNren kritikei
erantzun die

A. Unanue / Iruñea

NAFARROAKO alderdi sozialistak UPNren aurkako zentsura moziorik ez duela lagunduko ziurtatu zuen atzo Manuel Lopez Mazuelas PSNko gestorako kideak. Mazuelasek esan zuenez, UPNren eta PSNren arteko lankidetzak «mesede handia» egin dio Nafarroari, eta sozialistek ez dute elkarlana uzteko inolako asmorik.

Zentsura mozioaren aukera Felix Taberna IUko koordinatzaileak aipatu zuen bezperan. Felix Tabernak adierazi zuen PSNko gestora militante sozialisten nahiaren kontra ari dela jokatzeko, eta alderdi horrek kongresua egiten duenean ustekabekoren bat egon daitekeela —kongresuan nagusitzen direnak UPNren aurkako mozio aurkeztea, hain zuzen ere—. Manuel Lopez Mazuelasek, berriz, erabat baztertu zuen aukera hori, datoen urteotan PSN nork zuzenduko duen ez dakitela aitortu bazuen ere. PSN ekainaren bukaera egitekoa zen kongresua, baina duela pare bat aste atzeratzea erabaki zuen gestorak, denborarekin alderdi barneko tirabirak baretuko diren esperantzaz.

Konpenezinak ez dira horregatik amaitu, ordea. PSNko gestorak alderdi horretako talde parlamentarioaren aurka egin du berriro: parlamentarioek Jose Ignacio Lopez Borderias UPNko senadorearen zenbait adierazpen gaitzetsi nahi zituzten, baina gestorak ez die utzi.

Mazuelasi oso «larriak» eta «erabat zentzugabeak» iruditu zitzaizkion IUren kritikak, eta PSNko gestorak horrelako erasoak erantzunik gabe ez dituela utziko azpimarratu zuen. Azken erasoak atzo goizean jaso zuen PSNko gestorak, Juan Cruz Alli CDNko lehendakariaren ahotik. PSNko gestora «UPNren manporreroa» dela esan zuen Allik, eta gehitu zuen sozialistek lan zikin guztia egiten diotela Nafarroako eskuinari. CDNko lehendakariak UPNk eta PSNk bat eginik alderdi horren ekimen parlamentario guztiak blokeatzen dituztela salatu zuen.

Mazuelasen iritziz, «Alliren erasoak ez dute erantzunik ere merezi. Denok ezagutzen dugu Alli, eta jakin badakigu egun batean 'zuri' eta hurrengoan 'beltz' esaten duela. Bost axola zaio zein alderditan dagoen; goizean ezkertiarra dela esaten du eta arratsaldean, berriz, eskuindarra sentitzen da». Ildo beretik, CDNren kritikak serio hartzerik ez dagoela esan zuen PSNko gestorako kideak. X